

AKADEMIK SREĆKO ŠIMIĆ (1929–2011)



Srećko Šimić je rođen 1929. u Travniku. Diplomirao je na Medicinskom fakultetu Univerziteta u Sarajevu 1954, specijalistički ispit iz Ginekologije i akušerstva položio je 1961. na Ginekološko-akušerskoj klinici Univerziteta u Sarajevu. Habilitacioni rad pod naslovom *Mogućnosti laparoskopije i kuldoskopije u ginekološkoj dijagnostici* odbranio je 1968, a doktorsku disertaciju pod naslovom *Neki efekti estrogena i progesterona na subepitelnu kapilarnu mrežu vaginalnog dijela uterusa* odbranio je 1972. godine.

Radi stručnog usavršavanja skoro dvije godine proveo je na klinikama u Ljubljani, Gracu, Beču, Munchenu, Hamburgu, Kielu, Stokholmu, Londonu i Oxfordu. Za asistenta na Katedri za ginekologiju i akušerstvo izabran je 1961, za docenta 1968, za vanrednog profesora 1974. i za redovnog profesora 1982. Za profesora emeritusa izabran je 1998, za dopisnog člana ANUBiH 2002, a za redovnog člana ANUBiH 2008. godine.

Bio je direktor Ginekološko-akušerske klinike od 1974. do 1994. godine. U tom vremenu Ginekološko-akušerska klinika s 10.000 poroda godišnje i s hiljadama ginekoloških operacija bila je jedna od najvećih klinika u Evropi. U kliničku praksu uveo je sve u tom vremenu najsuvremenije dijagnostičke i terapijske metode. U svakodnevnu praksu uveo je vakuum ekstraktor za dovršavanje vaginalnog poroda, amnioskopiju, Ph fetalne krvi, kardiotokografiju (CTG), ultrazvučnu dijagnostiku (treći ultrazvučni aparat u Jugoslaviji) i ekstraperitonealni carski rez.

Uveo je mnogobrojne abdominalne i vaginalne operacije, a posebno značajnu vaginalnu operaciju kod cervikalnog karcinoma (Schauta). Kasnije uvodi kolposkopiju i kolpomikroskopiju s konizacijom.

Prvi na prostoru Jugoslavije (1962) u kliničku praksu uvodi kuldoskopiju i laparoskopiju i na prvom svjetskom kongresu „Celioskopija u ginekologiji” u Palermu, u oktobru 1964, objavljuje dva vrlo značajna rada. Od 1992. do 1997. bio je član Direktorijuma KUC. Umirovljen je 1998. Od 1998. do kraja života radio je kao savjetnik na Ginekološko-akušerskom odjeljenju Opće bolnice „Prim. dr. Abdulah Nakaš“ u Sarajevu, a bio je i pročelnik katedre za Ginekologiju i porodiljstvo Fakulteta zdravstvenih studija od 2002. u Mostaru. Bio je mentor 18 doktorskih disertacija i 25 magistarskih radova.

Kao autor objavio je sljedeće knjige: *Celioskopija u ginekologiji* (Sarajevo 1967); *Urgentna stanja u ginekologiji i opstetriciji* (Sarajevo 1974); *Endoskopija*

u ginekologiji i opstetriciji (Zagreb 1981); *Urgentna stanja u ginekologiji i opstetriciji* (dopunjeno izdanje); *Rađanje i rat u Sarajevu* (Sarajevo 1997); *Childbirth and the War in Sarajevo* (Sanhose 1988); *Ginekologija i opstetricija, akutna i urgentna stanja* (Muller 2003); *Ginekologija i perinatologija* (Mostar 2005). U koautorstvu je objavio sljedeće knjige: *Antibiotici i antibiotska terapija* (Zagreb 1971); *Perinatalna medicina* (Zagreb 1977); *Porodiljstvo* (Beograd–Zagreb 1977); *Carski rez* (Novi Sad 1981); *Ginekologija i perinatologija* (Zagreb 1989); *Ginekologija i perinatologija* (drugo prošireno izdanje 1995); *Perinatalni trendovi u BiH* (Sarajevo 2006); *Simpozijum „Učestalost, dijagnostika i terapija genitalnog karcinoma u BiH“* (Sarajevo 2007); *Simpozijum „Perinatalni trendovi i socioekonomski status u BiH“* (Sarajevo 2009). Pored ovoga, objavio je 198 stručnih i naučnih publikacija. Učestvovao je na mnogobrojnim svjetskim, evropskim, jugoslavenskim i poslijeratnim kongresima.

Dobitnik je sljedećih priznanja i nagrada: Dvadesetsedmojulska nagrada BiH 1989, Plaketa Univerziteta u Sarajevu s poveljom 1992, Leading Intellectuals of the World, USA 2004, Povelja Kliničkog centra Univerziteta u Sarajevu 2005, Velika plaketa Medicinskog fakulteta Univerziteta u Sarajevu 2007. i Hipokratova povelja Liječničke komore Kantona Sarajevo 2009.